

17. „OKUPIMO SE”

(19. februar 1984)

Sada nema više ni formalne dileme – najveći autoritet olimpijske porodice, predsjednik MOK-a Huan Antonio Samarán, juče je na posljednjoj konferenciji za štampu, oficijelno obznanio da su Zimske olimpijske igre u Sarajevu najbolje organizovane igre u historiji. Rekao je u krcatoj novinarskoj sali da je sve, naprosto, funkcionisalo besprijekorno – od saobraćaja, uslova života takmičara do izvanredne organizacije press-centara.

Novinari ko novinari, pri ovako rezolutno povoljnoj ocjeni svih napora sarajevskih organizatora, ipak, nisu mogli bez intrigirajućih pitanja. Tragali su za pokojom sumornijom riječi. Jedno od takvih pitanja, na primjer, bilo je: da li gospodin Samarán ima bar i jednu zamjerku organizaciji? Slijedio je življani odgovor iskusnog diplomate:

- „*Da. Moja primjedba odnosi se na vrijeme, ali to nije bilo u moći organizatora. No, i ono se izmijenilo i sve je proteklo bez posljedica...*”

Olimpijski čelnik posebno je, na ovom završnom službenom nastupu pred svjetskom i domaćom štampom, oduševljen ambijentom u Sarajevu u kojem su se sportisti takmičili i živjeli u duhu saradnje, prijateljstva i bratstva. To je, dodao je, velika poruka za sve buduće organizatore ovog takmičenja. Sarajevo nije veliki grad, niti je ovo velika zemlja – zaključio je Samarán – ali su bili organizatori velike olimpijade koje će se svi učesnici rado sjećati.

Na ovom susretu sa „sedmom silom” gotovo identične ocjene dali su i predsjednici međunarodnih federacija za skijanje, bob, hokej, biatlon, sanjkanje, kao i predsjednik Medicinske komisije MOK-a. Svi su jednstveni u ocjeni da je organizacija bila savršena i da je na borilištima sportistima omogućeno sve što je potrebno za uspješna takmičenja.

Odjek ovog službenog priznanja organizatorima XIV ZOI, naravno, zahvaljujući medijima, munjevito je prešao sve meridijane. Sa jednog od tih geografskih pojmova, iz dalekog kanadskog Kalgarija, stigla je među prvim čestitka Sarajevu za ovaj veliki uspjeh, ali uz posebnu ponesenost narednog domaćina Igara sarajevskim podvigom. U poruci, koju je poslao William Pratt, predsjednik Izvršnog odbora OK XV ZOI, naime, kaže se i ovo:

- „*...Srećni smo što smo za vrijeme boravka u Sarajevu svakog dana imali prilike da naučimo ponešto što će nam biti važno u organizaciji XV ZOI 1988.*”